


von Wulf Wager

## Dr Bedienung ihr Busa



I gang gern amol en meim Lieblingsgashaus en Neckartouffeng mit meira Angetrauta zom Essa. Dort gibt's net bloß a nette Chefin, an super guada Koch ond tolle Gerichte mit Zuatata aus dr Region, noi, es isch dort oifach au schee dekoriert ond obacha gmiatlich. Ond es geit a a oheimlich nette Bedienung. Dui hot zwar en Sprochfehler, weil se aus Nordoschtdeutschland kommt, aber alles andere isch perfekt.

Mir war emmer peinlich, dass sie mi mit Nama begrüßt hot ond i nia gwisst han, wia sie eigentlich hoißt. Letscht Woch war mr wieder amol zom Essa am Obend gschwend dort. Ond i glei gmerkt, dass sie plötzlich a Namensschildle uf da Busa nag'steckt ghet hot. Jetzt hätt i jo die Chance ghet, ihren Nama in Erfahrung zom bringa. Aber i ka doch derra net uf da Busa glotza. Wie käm des den a? Denn vor des Wolla hot dr Herrgott des Könna gsetzt. Ond i hätt zwar wella, aber han net kenna, denn zom Lesa brauch i a Lesebrill. Also hätt i so näh an ihren Busa na miassa zom des Schildle lesa, dass i bestimmt oine gfanga hätt - ond zwar net bloß von dr Bedienung, sondern au von meira Frau, die mir geganiebr gessa ischt.

Also ben i wieder amol aus meim Lieblingsgashaus homim, ohne zom wissa, wie mei Lieblingsbedienung hoißt. Wenigschtens bleibt mei quadr Ruf ond dr Frieda drhoim erhalta.

Bis näggschd Woch'

Ihr